



~ 16  
2690  
14





白氏長慶集卷第二十五

唐太子少傅刑部尚書致仕贈尚書右僕射太原

白居易樂天著

明後學松江馬元調巽甫校

律詩 凡一百首

感悟妄緣題如上人壁

自從為駭童直至作衰翁所好隨年異為忙終日同弄  
少成佛塔鏘玉謁王宮彼此皆兒戲須臾即色空有營  
非了義無着是真宗兼恐勤修道猶應在妄中

思子臺有感二首

凡題思子臺者皆罪江充子  
觀禍胎不獨在此偶以二絕



曾家機上聞投杼尹氏園中見授蜂但以恩情生隙罅  
何人不解作江文

闇生魑魅蠹生蟲何異讒生疑阻中但使武皇心似燭  
江文不敢作江文

賦得邊城角

邊角兩三枝霜天隴上兒望鄉相並立向月一時吹戰  
馬頭皆舉征人手盡垂嗚嗚三奏罷城上展旌旗

憶洛中所居

忽憶東都宅春來事宛然雪銷行徑裏冰上臥房前厭

昭和九年  
十一月二日  
購求

綠栽黃竹嫌紅種白蓮醉教鷺送酒閒遣鶴看船幸是  
林園主慙為食祿牽宦情薄似紙鄉思急如弦豈合姑  
蘇守歸休更待年

想歸田園

戀他朝市求何事想取丘園樂此身千首惡詩吟過日  
一壺好酒醉消春歸鄉年亦非全老罷郡家仍未苦貧  
快活不知如我者人間能有幾多人

琴茶

兀兀寄形羣動內陶陶任性一生閒自拋官後春多醉  
不讀書來老更閒琴裏知聞唯淥水茶中故舊是蒙山



窮通行止長相伴誰道吾今無往還

贈楚州郭使君

淮水東南第一州山圍雉堞月當樓黃金印綬懸腰底  
白雲歌詩落筆頭笑看兒童騎竹馬醉攜賓客上仙舟  
當家美事堆身上何啻林宗與細侯

和郭使君題枸杞

山陽太守政嚴明吏靜人安無犬驚不知靈藥根成狗  
怪得時間吠夜聲

初到洛陽閒遊

漢庭重少身宜退洛下閒居迹可逃趁伴入朝應老醜

尋春放醉尚粗豪詩攜綵紙新裝卷酒典緋花舊賜袍  
曾在東方千騎上至今躑躅馬頭高

醉贈劉二十八使君

為我引杯添酒飲與君把筋擊盤歌詩稱國手徒為爾  
命壓人頭不奈何舉眼風光長寂寞滿朝官職莫蹉跎  
亦知合被才名折二十三年折太多

太湖石

煙翠二秋色波濤萬古痕削成青玉片截斷碧雲根風  
氣通巖穴苔文護洞門三峯俱體小應是華山孫

過敷水



白集 卷五  
垂鞭欲渡羅敷水處分鳴騶且緩驅秦氏雙蛾久冥冥  
蘇臺五馬尚踟躕村童店女仰頭笑今日使君真是愚

南院

林院無情緒經春不一開楊花飛作穗榆莢落成堆壯  
氣從中減流年逐後催只應如過客病去老迎來

閒詠

步月憐清景眠松愛綠陰早年詩思苦晚歲道情深夜  
學禪多坐秋牽興暫吟悠然兩事外無處更留心

初授祕監拜賜金紫閒吟小酌偶寫所懷

紫袍新祕監白首舊書生鬢雪人閒壽腰金世上榮子

孫無可念產業不能營酒引眼前興詩留身後名閒傾  
三數酌醉詠十餘聲便是羲皇代先從心太平

新昌閒居招楊郎中兄弟

紗巾角枕病眠翁忙少閒多誰與同但有雙松當砌下  
更無一事到心中金章紫綬看如夢皂蓋朱輪別似空  
暑月貧家何所有客來唯贈北窓風

祕省後廳

槐花兩潤新秋地桐葉風翻欲夜天盡日後廳無一事  
白頭老監枕書眠

松齋偶興



置心思慮外減跡是非閒約俸為生計隨官換往還耳  
煩聞曉角眼醒見秋山賴此松簷下朝回半日間

和楊郎中賀楊僕射致仕後楊侍郎門生合宴

席上作

業重關西繼大名恩深闕下遂高情祥鱣降伴趨庭鯉  
賀燕飛和出谷鸞范蠡舟中無子弟疎家席上欠門生  
可憐玉樹連桃李從古無如此會榮

松下琴贈客

松寂風初定琴清夜欲闌偶因羣動息試撥一聲看寡  
鶴當微怨秋泉應指寒慙君此傾聽本不為君彈

秋齋

晨起秋齋冷蕭條稱病容清風兩牕竹白露一庭松阮  
籍謀身拙嵇康向事慵生涯別有處浩氣在心胸

塗山寺獨遊

野徑行無伴僧房宿有期塗山來去熟唯是馬蹄知

登觀音臺望城

百千家似圍棋局十二街如種菜畦遙認微微人朝火  
一條星宿五門西

登靈應臺北望

臨高始見人寰小對遠方知色界空回首却歸朝市去



一稊米落太倉中

酬裴相公題興化小池見招長句

為愛小塘招散客，不嫌老監與新詩。  
山翁倒載無妨學，范蠡扁舟未要追。  
蓬斷偶飄桃李徑，鷗驚誤拂鳳凰池。  
敢辭課拙酬高韻，一勺爭禁萬頃陂。

閒行

五十年來思慮熟，忙人應未勝閒人。  
林園傲逸真成貴，衣食單疎不是貧。  
專掌圖書無過地，遍尋山水自由身。  
儻年七十猶強健，尚得閒行十五春。

閒出

兀兀出門何處去，新昌街晚樹陰斜。  
馬蹄知意緣行熟，不向楊家即康家。

與僧智如夜話

懶鈍尤知命，幽棲漸得朋。  
門閒無謁客，室靜有禪僧。  
爐向初冬火，籠停半夜燈。  
憂勞緣智巧，自喜百無能。

憶廬山舊隱及洛下新居

形骸僂俛班行內，骨肉勾留俸祿中。  
無奈攀緣隨手長，亦知恩愛到頭空。  
草堂久閉廬山下，竹院新拋洛水東。  
自是未能歸去得，世閒誰要白鬚翁。

晚寒



急景流如箭，淒風利似刀。暝催雞翅斂，寒束樹枝高。縮  
水濃和酒，加飴厚絮袍。可憐冬計畢，煖臥醉陶陶。

偶眠

放杯書案上，枕臂火爐前。老少尋思事，慵多取次眠。妻  
教卸烏帽，婢與展青氈。便是屏風樣，何勞畫古賢。

華城西北雉堞最高，崔相公首創樓臺。錢左丞  
繼種花果，合為勝境。題在雅篇，歲暮獨悵然。

成詠時華州未除刺史

高居稱君子，瀟洒四無隣。丞相棟梁久，使君桃李新。疑  
情看麗句，駐步想清塵。况是寒夫客，樓空無主人。

奉使塗中戲贈張常侍

早風吹土滿，長衢驛騎星。軺盡疾驅共，笑籃舁亦稱使。  
日馳一驛向東都。

有小白馬乘馭多時，奉使東行至稠桑驛。溘然  
而斃，足可驚傷，不能忘情。題二十韻。

能驟復能馳，翩翩白馬兒。毛寒一團雪，鬃薄萬條絲。皂  
蓋春行日，驪駒曉促時。雙旌前獨步，五馬內偏騎。芳草  
承蹄葉，垂楊拂頂枝。將迎好客惜，不換妖姬慢鞚遊。  
蕭寺間驅醉，習池睡來乘。作夢興發倚成詩，鞭為馴難  
下鞍。綠穩不離北，歸還共到東。使亦相隨，赭白何曾變。



玄黃豈得知嘶風覺聲急  
 踏雪怪行遲昨夜猶芻秣  
 今朝尚繫維臥槽應不起  
 顧主遂長辭塵滅鬣鬣迹  
 霜留皎皎姿度關形未改  
 過隙影難追念倍燕求駿  
 情深項別騅銀收鉤臆帶金  
 卸絡頭羈何處理奇骨誰  
 家竟弊帷稠桑驛門外吟  
 罷涕雙垂

題噴玉泉

泉在壽安山下高百餘尺直瀉潭中

泉噴聲如玉潭澄色似空  
 練垂青嶂上珠寫綠盆中  
 溜瀟三秋雨寒生六月風  
 何時此岩下來作濯纓翁

酬皇甫賓客

聞官兼慢使著處易停輪  
 况欲逢新歲仍初見故人

寒尋到洛待煖始歸秦亦擬同攜手城東略看春

種白蓮

吳中白藕洛中栽莫戀江南花  
 懶開萬里攜歸爾知否紅蕉朱槿不將來

荅蘇庶子

偶作關東使重陪洛下游病來從斷酒  
 老去可禁愁款曲偏青眼蹉跎各白頭  
 逢山閒氣味依約似龍樓

荅尉遲少監水閣重宴

人情依舊歲華新今日重招往日賓  
 雜黍重回千里駕林園閤換四年春  
 春水軒平寫琉璃鏡草岬斜鋪翡翠茵



聞道經營費心力時主人欲賣林亭忍教成後屬他人

和劉郎中傷鄂姬

不獨君嗟我亦嗟西風北雪殺南花不知月夜魂歸處  
鸚鵡洲頭第幾家姬鄂人也

贈東隣王十三

攜手池邊月開襟竹下風驅愁知酒力破睡見茶功居  
處東西接年顏老少同能來為伴否伊上作漁翁

早春同劉郎中寄宣武令狐相公

梁園不到一年強遙想清吟對綠觴更有何人能飲酌  
新添幾卷好篇章馬頭拂柳時回轡豹尾穿花暫亞槍

誰引相公開口笑不逢白監與劉郎

寄太原李相公

聞道北都今一變政和軍樂萬人安綺羅二八圍賓榻  
組練三千夾將壇蟬鬢應誇丞相少貂裘不覺太原寒  
世間大有虛榮貴百歲無君一日歡

雪中寄令狐相公兼呈夢得

兔園春雪梁王會想對金壘詠玉塵今日相如身在此  
不知客又坐何人

出使在途所騎馬死改乘肩輿將歸長安偶詠

旅懷寄太原李相公



驛路崎嶇况雪寒欲登籃輦一長歎風光不見桃花騎  
塵土空留杏葉鞍喪乘獨歸殊不易脫驂相贈豈為難  
并州好馬應無數不怕旌旄試覓看

有雙鶴畱在洛中忽見劉郎中依然鳴顧劉因

為鶴歎二篇寄予予以二絕句答之

辭鄉遠隔華亭水逐我來樓緱嶺雲慙愧稻梁長不飽  
未曾迴眼向雞羣

荒草院中池水畔銜恩不去又經春見君驚喜雙回顧  
應為吟聲似主人

宿寶使君莊水亭

使君何在在江東池柳初黃杏欲紅有興即來閒便宿  
不知誰是主人翁

龍門下作

龍門澗下濯塵纓擬作閒人過此生筋力不將諸處用  
登山臨水詠詩行

姚侍御見過戲贈

晚起春寒慵裹頭客來池上偶同遊東臺御史多提舉  
莫按金章繫布裘

履道春居

微雨洒園林新晴好一尋低風洗池面斜日拆花心



助嵐陰重春添水色深不如陶省事猶抱有絃琴

題洛中第宅

水木誰家宅門高地寬懸魚挂青甃行馬護朱欄春  
樹籠煙煖秋庭鏤月寒松膠粘琥珀筠粉撲琅玕試問  
池臺主多為將相官終身不曾到唯展宅圖看

寄殷協律

多敘江南舊遊

五歲優游同過日一朝消散侶浮雲  
琴詩酒伴皆拋我  
雪月花時最憶君  
幾度聽雞歌白日亦曾騎馬詠紅裙  
予在杭州日有歌云聽唱黃雞與白日又有詩云著紅騎馬是何人吳姬暮雨蕭蕭曲自別江雨更不聞江南吳二娘曲詞云暮雨蕭蕭郎不歸

洛下諸客就宅相送偶題西亭

几榻臨池坐軒車冒雪過交親  
致杯酒僮僕解笙歌  
流歲行將晚浮榮得幾多  
林泉應問我不住意如何

荅林泉

好住舊林泉回頭一悵然  
漸知五滌倒深愧爾雷連欲  
作樓雲計須營種黍錢  
更容求一郡不得亦歸田

將發洛中枉令狐相公手札兼辱二篇寵行以  
長句荅之

尺素忽驚來梓澤雙金不惜送蓬山  
八行落泊飛雲雨  
五字鎗鏃動珮環玉韻乍聽堪醒酒  
銀鉤細讀當披顏



自集 卷三十一  
收藏便作終身寶何啻二年懷袖間

臨都驛答夢得六言二首

楊子津頭月下臨都驛裏燈前昨日老於前日去年不  
侶今年

謝守歸爲祕監馮公老作郎官前事不須問着新詩且  
更吟看

喜錢左丞再除華州以詩伸賀

左轄輟中臺東門委上才彤襜經宿到絳帳及春開民  
望懇難奪天心慈易回那知不隔歲重借寇恂來

和錢華州題少華清光絕句

高情雅韻三峰守主領清光管白雲自笑亦曾爲刺史  
蘇州肥膩不如君

送陝府王大夫

金馬門前回劍珮鐵牛城下擁旌旗他時萬一爲交代  
畱取甘棠三兩枝

代迎春花招劉郎中

幸與松筠相近栽不隨桃李一時開杏園豈敢妨君去  
未有花時且看來

翫迎春花贈楊郎中

金英翠萼帶春寒黃色花中有幾般憑君語向遊人道



白集 卷三十五 十一  
莫作蔓菁花眼看

閒出

身外無羈束，心中少是非。被花畱便住，逢酒醉方歸。人事行時少，官曹入日稀。春寒遊正好，穩馬薄綿衣。

座中贈盧判官

把酒承花，花落頻。花香酒味相和春，莫言不是江南會。虛白亭中舊主人。

曲江有感

曲江西岸又春風，萬樹花前一老翁。遇酒逢花還且醉，若論惆悵事何窮。

杏園花下贈劉郎中

怪君把酒偏惆悵，曾是貞元花下人。自別花來多少事，東風二十四回春。

花前有感兼呈崔相公劉郎中

落花如雪鬢如霜，醉把花看益自傷。少日為名多檢束，長年無興可顛狂。四時輪轉春常少，百刻支分夜苦長。何事同生壬子歲，老於崔相及劉郎。

微之就拜尚書居易續除刑部因書賀意兼詠

離懷

我為憲部入南宮，君作尚書鎮浙東。老去一時成白首，



別來七度換春風，簪纓假合虛名在。勛力銷磨實事空，遠地官高親故少。些些談笑與誰同。

喜與韋左丞同入南省因敘舊以贈之

早年同遇陶鈞主，利鈍精粗共在鎔。憲宗朝與韋同入翰林金劍淬來長透匣，鉛刀磨盡不成鋒。差肩北省慙非據，接武南宮幸再容。跛鼈雖遲騏驥疾，何妨中路亦相逢。

伊州

老去將何散老愁，新教小玉唱伊州。亦應不得多年聽，未教成時已白頭。

早朝

鼓動出新昌，雞鳴赴建章。翩翩穩鞍馬，楚楚健衣裳。官漏傳殘夜，城陰送早涼。月堤槐露氣，風燭樺煙香。雙闕龍相對，千官鴈一行。漢庭方尚少，慙歎鬢如霜。

答裴相公乞鶴

驚露聲音好，冲天相貌殊。終宜向遼廓，不稱在泥塗。白首勞為伴，朱門幸見呼。不知疎野性，解愛鳳池無。

晚從省歸

朝回北闕值清晨，晚出南宮送暮春。入去丞郎非散秩，歸來詩酒是閒人。猶思泉石多成夢，尚歎簪裾未離身。終是不如山下去，心頭眼底兩無塵。



北牕閒坐

虛牕兩叢竹，靜室一爐香。門外紅塵合，城中白日忙。無煩尋道士，不要學仙方。自有延年術，心閒歲月長。

酬嚴給事

聞玉菜花下有遊仙絕句

瀛女偷乘鳳，去時洞中潛。歇弄瓊枝不綠啼，鳥春饒舌青瑣仙郎何得知。

京路

西來為看秦山雪，東去綠尋洛苑春。來去騰騰兩京路，閒行除我更無人。

華州西

每逢人靜慵多歇，不計程行困即眠。上得籃輦未能去，春風敷水店門前。

從陝至東京

從陝至東京，山低路漸平。風光四百里，車馬十二程。花共垂鞭看，杯多並轡傾。笙歌與談笑，隨分自將行。

送春

銀花鑿落從君勸，金屑琵琶為我彈。不獨送春兼送老，更嘗一酌更聽看。

宿杜曲花下

覓得花千樹，攜來酒一壺。懶歸兼擬宿，未醉豈勞扶。但



惜春將晚寧愁日漸晡  
 籃輦為臥舍漆盃盧谷切是行厨  
 斑竹盛茶櫃紅泥爨飯爐  
 眼前無所闕身外更何須小  
 面琵琶婢蒼頭屬築奴從君飽富貴曾作此遊無

逢舊

久別偶相逢俱疑但夢中  
 即今歡樂事放盞又成空

繡婦歎

連枝花樣繡羅襦本擬新年餉小姑  
 自覺逢春饒悵望誰能每日起工夫  
 針頭不解愁眉結線縷難穿淚臉珠  
 雖凭繡牀都不語同牀繡伴得知無

春詞

低花樹映小粧樓春入眉心兩點愁  
 斜倚欄干問鸚鵡思量何事不回頭

恨詞

翠黛眉低斂紅珠淚闌銷曾來恨入意不肯  
 但今朝

山石榴花十二韻

曄曄復煌煌花中無比方  
 艷天宜小院條短稱低廊  
 本是山頭物今為砌下芳  
 千叢相向背萬朵互低昂  
 照灼連朱檻玲瓏映粉牆  
 風來添意態日出助晶光  
 漸綻燕脂萼猶含翠軫房  
 離披亂剪綵斑駁未勻粧  
 絳焰燈干炷紅裙妓一行  
 此時逢國色何處覓天香  
 恐合栽金闕



思將獻玉皇好差青鳥使封作百花王

送敏中歸幽寧幕

六十衰翁兒女悲傍人應笑爾應知弟兄垂老相逢日  
杯酒臨歡欲散時前路加殮須努力今宵盡醉莫推辭  
司徒知我難為別直過秋歸未訝遲

宴散

小宴追涼散平橋步月回笙歌歸院落燈火下樓臺殘  
暑蟬催盡新秋鴈帶來將何迎睡興臨臥舉殘杯

人定

人定月朧明香消枕簟清翠屏遮燭影紅袖下簾聲坐

久吟方罷眠初夢未成誰家教鸚鵡故語相驚

池上

嫋嫋涼風動淒淒寒露零蘭衰花始白荷破葉猶青獨  
立棲沙鶴雙飛照水螢若為寥落境仍值酒初醒

池客

池晚蓮芳謝牕秋竹意深更無人作伴唯對一張琴

花酒

香醅鋪切浮如蟻雲鬢新梳薄似蟬為報洛城花  
酒道莫辭送老二三年

題崔常侍濟源莊



谷口誰家住雲扃鎖竹泉主人何處去蘿薜換貂蟬籍  
在金閨內班排玉宸前誠知憶山水歸得是何年

認春戲呈馮少尹李郎中陳主簿

認得春風先到處西園南面水東頭柳初變後條猶重  
花未開時枝已稠閣助醉歡尋綠酒潛添睡興著紅樓  
知君未別陽和意直待春深始擬遊

魏堤有懷

魏王堤下水聲似使君灘惆悵回頭聽躊躇立馬看蕩  
風波眼急翻雪浪心寒憶得瞿塘事重吟行路難

柘枝詞

柳閣長廊合花深小院開蒼頭鋪錦褥皓腕捧銀杯繡  
帽珠稠綴香衫袖窄裁將軍拄毬杖看按柘枝來

代夢得吟

後來變化二分貴同輩凋零太半無世上爭先從盡汝  
人間鬪在不如五竿頭已到應難久局勢雖遲未必輸  
不見山苗與林葉迎春先綠亦先枯

寄荅周協律來詩多敘蘇州舊遊

故人敘舊寄新篇惆悵江南到眼前閣想樓臺萬餘里  
不聞歌吹一周年橋頭誰更看新月池畔猶應泊舊船  
最憶後亭杯酒散紅屏風掩綠窓眠







贈悼懷太子挽歌辭二首奉詔撰進

竹馬書臺歲銅龍表葬時永言窀穸事全用少陽儀壽  
天由天命哀榮出聖慈恭聞褒贈詔軫念在華夷  
剪葉藩封早承華冊命尊笙歌辭洛苑風雪救梁園  
薄凌霜宿銘旌向月翻宮寮不逮事哭送出都門

對雨中招張司業宿

過夏衣香潤迎秋簾色鮮斜支花石枕臥詠藥珠篇泥  
潭非遊日陰沉好睡天能來同宿否聽雨對牀眠

和集賢劉學士早朝作

吟君昨日早朝詩金御爐前喚仗時煙吐白龍頭宛轉

扇開青雉尾參差暫留春殿多稱屈合入綸闈即可知  
從此塵霄去非晚鬢閒未有一莖絲

送陝州王司馬建赴任建善詩者

陝西司馬去何如養靜資貧兩有餘公事閒忙同少尹  
料錢多少敵尚書祗攜美酒為行伴唯作新詩趣下車  
自有鐵牛無詠者料君投刃必應虛

對琴待月

竹院新晴夜松牕未臥時共琴為老伴與月有秋期玉  
軫臨風久金波出霧遲幽音待清景唯是我心知

楊家南亭



小亭門向月斜開滿地涼風滿地苔此院好彈秋思處  
終須一夜抱琴來

早寒

黃葉聚牆角青苔圍柱根被經霜後薄鏡遇雨來昏半  
卷寒簷幕斜開暖閣門迎冬兼送老只仰酒盈樽

齋月靜居

病來心靜一無思老去身閒百不為忽忽眼塵猶愛睡  
些些口業尚誇詩葷腥每斷齋居月香火常親宴坐時  
萬慮消停百神泰唯應寂寞殺三尸

宿裴相公興化池亭

兼蒙借船  
助遊汎

林亭一出宿風塵忘却平津是要津松閣晴看山色近  
石渠秋放水聲新孫弘閣闢無閒客傳說舟忙不借人  
何似掄才濟川外別開池館待交親

和劉郎中望終南山秋雪

遍覽古今集都無秋雪詩陽春先唱後陰嶺未消時草  
訝霜疑重松疑鶴散遲清光莫獨占亦對白雲司

廣府胡尚書頌寄詩因答絕句

尚書清白臨南海雖飲貪泉心不回唯向詩中得珠玉  
時時寄到帝鄉來

送鶴與裴相臨別贈詩



司空愛爾爾須知不信聽吟送鶴詩羽翮勢高寧惜別  
稻梁恩厚莫愁飢夜棲少共雞爭樹曉浴先饒鳳占池  
穩上青雲勿回顧的應勝在白家時

今孤相公拜尚書後有喜從鎮歸朝之作劉郎

中先和因以繼之

車騎新從梁苑回履聲珮響入中臺鳳池望在終重去  
龍節功成且納來金勒最宜乘雪出玉觴何必待花開  
尚書首唱郎中和不計官資只計才

送河南尹馮學士赴任

石渠金谷中間路軒騎翩翩十日程清洛飲冰添苦節

碧嵩看雪助高情謾誇河北操旄鉞莫羨江西擁旆旌  
時新除鎮節度何侶府寮京令外別教二十六峯迎

讀鄂公傳

高臥深居不見人功名抖擻似灰塵唯留一部清商樂  
月下風前伴老身

賦得烏夜啼

城上歸時晚庭前宿處危月明無葉樹霜滑有風枝啼  
澀飢喉咽飛低凍翅垂畫堂鸚鵡鳥冷暖不相知

鏡換杯

欲將珠匣青銅鏡換取金樽白玉卮鏡裏老來無避處



樽前愁至有消時，茶能散悶為功淺。宣縱忘憂得力遲，  
不似杜康神用速。總分一盞便開眉。

冬夜聞蟲

蟲聲冬思苦於秋，不解愁人聞亦愁。我是老翁聽不畏，  
少年莫聽白君頭。

雙鸚鵡

綠衣整頓雙棲起，紅觜分明對語時。始覺琵琶絃索  
方知吉了舌參差。鄭牛識字吾常歎，諺云鄭玄家牛觸墻成八字  
鶴能歌爾亦知。若稱白家鸚鵡鳥籠中，兼合解吟詩。

贈朱道士

儀容白皙上仙郎，方寸清虛內道場。兩翼化生因服藥，  
三戶臥死為休糧。醮壇北向宵占斗，寢室東開早納陽。  
盡日窓閒更無事，唯燒一炷降真香。

昨以拙詩十首寄西川杜相公，相公亦以新作  
十首惠然報示，首數雖等，工拙不倫，重以一章用伸答謝。

詩家律手在成都，權與尋常將相殊。剪截五言兼用鉞，  
陶鈞六義別開爐。驚人卷軸須知有，隨事文章不道無。  
篇數雖同光價異，十魚自換十驪珠。

和令狐相公新於郡內栽竹百竿，折壁開軒，且



夕對翫偶題七言五韻

梁園修竹舊傳名久廢年深竹不生千畝荒涼尋未得  
百竿青翠種新成墻開乍見重添興牕靜時聞別有情  
煙葉蒙籠侵夜色風枝蕭颯欲秋聲更登樓望尤堪重  
千萬人家無一莖并無竹

重答汝州李六使君見和憶吳中舊遊五首

為憶娃宮與虎丘翫君新作不能休蜀牋寫出篇篇好  
吳調吟詩句句愁洛下林園終共住江南風月會重遊  
先與李六有約由來事過多堪惜何況蘇州勝汝州李前刺蘇州故有是句

見殷堯藩侍御憶江南詩三十首詩中多敘蘇

杭勝事余嘗與二郡因繼和之

江南名郡數蘇杭寫在殷家二十章君是旅人猶苦憶  
我為刺史更難忘境牽吟咏真詩國興入笙歌好醉鄉  
為念舊遊終一去扁舟直擬到滄浪

聞新蟬贈劉二十八

蟬發一聲時槐花帶兩枝只應催我老兼遣報君知白  
髮生頭速青雲入手遲無過一杯酒相勸數開眉

贈王山人

玉芝觀裏王居士服氣殮霞善養身夜後不聞龜喘息



秋來唯長鶴精神容顏盡怪長如故名姓多疑不是真  
貴重榮華輕壽命知君悶見世間人

和劉郎中學士題集賢閣

朱閣青山高庫齊與君才子作詩題傍聞大內笙歌近  
下視諸司屋舍低萬卷圖書天祿上一條風景月華西  
欲知丞相優賢意百步新廊不蹋泥

觀幻

有起皆因滅無睽不暫同從歡終作感轉苦又成空次  
第花生眼須臾竹過風更無尋覓處鳥跡印空中

病假中龐少尹攜魚相過

宦情牢落年將暮病假聯綿日漸深被老相催雖白首  
與春無分未甘心閒停茶碗從容語醉把花枝取次吟  
勞動故人龐閣老提魚攜酒遠相尋

聽田順兒歌

夏玉敲冰聲未停嫌雲不遏入青冥爭得黃金滿衫袖  
一時拋與斷年聽

聽曹剛琵琶兼示重蓮

撥撥絃絃意不同胡啼番語兩玲瓏誰能截得曹剛手  
插向重蓮衣袖中

酬令狐相公春日尋花見寄六韻



病臥帝王州花時不得遊老應隨日至春肯為人留粉  
壞杏將謝火繁桃向稠白飄僧院地紅落酒家樓空裏  
雪相似晚來風不休吟君悵望句如到曲江頭

和劉郎中曲江春望見示

芳景多遊客衰翁獨在家肺傷妨飲酒眼痛忌看花寺  
路隨江曲官墻夾樹斜羨君猶壯健不枉度年華

送東都留守令狐尚書赴任

翠華黃屋未東巡碧洛青嵩付大臣地稱高情多水竹  
山宜閒望少風塵龍門即擬為遊客金谷先憑作主人  
歌酒家家處處莫空管領上陽春

自題新昌居止因招楊郎中小飲

地偏坊遠巷仍斜最近東頭是白家宿雨長齊隣舍柳  
晴光照出夾城花春風小榼三升酒寒食深爐一碗茶  
能到南園同醉否笙歌隨分有些些

南園試小樂

小園斑駁花初發新樂錚鏦教欲成紅萼紫房皆手植  
蒼頭碧玉盡家生高調管色吹銀字慢拽歌詞唱渭城  
不飲一杯聽一曲將何安慰老心情

和微之春日投簡陽明洞天五十韻

青陽行已半白日坐將徂越國強仍大稽城高且孤利



饒鹽煮海名勝水澄湖牛斗天垂象台明地展圖天台四明  
 二環奇墳市井佳麗溢闡闡當向句踐遺風霸西施舊  
 俗姝船頭龍天矯橋脚獸睚眦鄉味珍螿蚶時鮮貴鷓  
 鴒語言諸夏異衣服一方殊搗練蛾眉婢鳴榔蛙角奴  
 江清敵伊洛山翠勝荆巫華表雙樓鶴聯墻幾點烏煙  
 波分渡口雲樹接城隅澗遠松如畫洲平水侶鋪綠秧  
 科早稻紫笋折新蘆暖蹋泥中藕香尋石上蒲雨來萌  
 盡達雷後蟄全蘇柳眼黃絲類花房絳蠟珠林風新竹  
 折野燒失照老桑枯帶鞞可切長枝蕙錢穿短貫榆  
 暄和生野菜卑濕長街蕪女浣紗相伴兒烹鯉一呼山

魁啼稚子林狄挂山都產業論蠶蟻孳生計鴨雛泉岩  
 雪飄灑苔壁錦漫糊堰限舟航路堤通車馬途耶溪岍  
 回合禹廟徑盤紆洞穴何因鑿星槎誰與剡石凹於交  
 仙藥曰峰峭佛香爐去為投金簡來因挈玉壺貴仍招  
 客宿健未要人扶問望賢丞相儀形美丈夫前驅駐旌  
 旆偏坐列筵竿刺史旗翻隼尚書履曳鳧學禪超後有  
 觀妙造虛無髻裏傳僧寶環中得道樞登樓詩八詠置  
 硯賦三都捧擁羅將綺趨紫與朱廟謨藏稷卨兵略  
 貯孫吳令下三軍整風高四海趨千家得慈母六郡事  
 嚴姑重士過三哺輕財抵一銖送觥歌宛轉嘲妓笑盧



胡佐飲時炮鼈燭醒數鱸鱸醉鄉雖咫尺樂事亦須臾  
 若不中賢聖何由外智愚伊予一生志我爾百年軀江  
 上三千里城中十二衢出多無伴侶歸只是妻孥白首  
 青山約拙身去得無

酬鄭侍御多雨春空過詩三十韻次用本韻

南雨來多滯東風動即狂月行離畢急龍走召雲忙鬼  
 轉雷車響蛇騰電策光浸淫天侶漏沮洳地成瘡慘淡  
 陰煙白空濛宿霧黃闇遮千里目悶結九回腸寂寞羈  
 臣館深沉思婦房鏡昏鸞滅影衣潤麝消香蘭濕難紉  
 珮花凋易落粧沾黃鶯翅重滋綠草心長紫陌皆泥濘

黃污共淼茫恐霖成怪珍望霽劇禎祥楚柳腰肢躡可丁

切湘筠涕淚滂晝昏疑是夜陰盛勝於陽居士巾皆墊

行人蓋盡張跳蛙還屢出移蟻欲深藏端坐交游廢間

行去步妨愁生垂白叟惱殺蹋青娘變海棠常須慮為魚

慎勿忘此時方共懼何處可相將此以下敘浙東政事已望東溟

禱仍封北戶禳却思逢旱魃誰喜見商羊預怕為蠶病

先憂作麥傷惠應施浹洽政豈假揄揚祀典修成秩農

書振滿牀丹誠期懇苦白日會昭彰賑廩贖飢戶苦城

備壞墻且當營歲事寧暇惜年芳德勝令災殫人安在

吏良尚書心若此不枉繫金章



和春深二十首

何處春深好春深富貴家馬為中路鳥妓作後庭花羅  
綺驅論象金銀用短車眼前何所苦唯苦日西斜  
何處春深好春深貧賤家荒涼三徑草冷落四隣花奴  
困歸備力妻愁出賃車途窮平路險舉足劇褒斜  
何處春深好春深執政家鳳池添硯水雞樹落花詔  
借當衢宅恩容上殿車延英開對久門與日西斜  
何處春深好春深方鎮家通犀排帶勝瑞鶴勒袍花飛  
絮衝毬馬垂楊拂妓車戎裝拜春殿左握寶刀斜  
何處春深好春深刺史家陰繁棠布葉岐秀麥分花五

足鳴珂馬雙輪畫軾車和風引行樂葉葉隼旗斜  
何處春深好春深學士家鳳書裁五色馬鬣剪三花蠟  
炬開明火銀臺賜物車相逢不敢揖彼此帽低斜  
何處春深好春深女學家慣看溫室樹飽識浴堂花御  
印提隨仗香牋把下車宋家官樣髻一片綠雲斜  
何處春深好春深御史家絮絮驄馬尾蝶繞繡衣花破  
粧行持斧埋輪立駐車人班遙認得魚貫一行斜  
何處春深好春深遷客家一杯寒食酒萬里故園花炎  
瘴蒸如火光陰走似車為憂鵬鳥至只恐日光斜  
何處春深好春深經業家唯求太常策不管曲江花折



程名慙邴收螢志慕車官場泥鋪處最怕寸陰斜  
 何處春深好春深隱士家野衣裁薜葉山飯晒松花蘭  
 索紉幽珮蒲輪駐軟車林閒箕踞坐白眼向人斜  
 何處春深好春深漁父家松灣隨棹月桃浦落船花投  
 餌移輕楫牽輪轉小車蕭蕭蘆葉裏風起釣絲斜  
 何處春深好春深潮戶家濤翻三月雪浪噴四時花曳  
 練馳千馬驚雷走萬車餘波落何處江轉富陽斜  
 何處春深好春深痛飲家十分杯裏物五色眼前花舖  
 歡眠糟甕流涎見翅車中山一沉醉千度日西斜  
 何處春深好春深上巳家蘭亭席上酒曲洛岬邊花弄

永遊童棹漸裾小婦車齊橈爭渡處一匹錦標斜  
 何處春深好春深寒食家玲瓏鏤雞子宛轉綵毬花碧  
 草追遊騎紅塵拜掃車鞦韆細腰女搖曳逐風斜  
 何處春深好春深博奕家一先爭破眼六聚鬪成花鼓  
 應投壺馬兵衝象戲車彈碁局上事最妙是長斜  
 何處春深好春深嫁女家紫排襦上雉黃貼鬢邊花轉  
 燭初移障鳴環欲上車青衣傳氈褥錦繡一條斜  
 何處春深好春深娶婦家兩行籠裏燭一樹扇閒花寶  
 拜登華席親迎障憶車催粧詩未了星斗漸傾斜  
 何處春深好春深妓女家眉欺楊柳葉裙妬石榴花蘭



麝熏行被金銅釘坐車杭州蘇小小人道最天斜

詠家醞十韻

獨醒從古笑靈均長醉如今數伯倫舊法依稀傳自杜  
杜康新方要妙得於陳陳郎中姑傳受此法井泉王相資重九麴葉  
精靈用上寅麴用七月上寅釀糯豈勞炊范忝撒笏何  
假漉陶巾常嫌竹葉猶凡濁始覺榴花不正真甕揭聞  
時香酷烈餅封貯後味甘辛捧疑明水從空化飲似陽  
和滿腹春色洞玉壺無表裏光搖金盞有精神能消忙  
事成閒事轉得憂人作樂人應是世間賢聖物與君還  
往擬終身

鶴池二首

高竹籠前無伴侶亂雞羣裏有風標低頭乍恐丹砂落  
晒翅常疑白雪消轉覺鷓鴣毛色下苦嫌鸚鵡語聲嬌  
臨風一嘆思何事悵望青田雲水遙  
池中此鶴鶴中稀恐是遼東老令威帶雪松枝翹膝脛  
放花菱片綴毛衣低迴且向林閒宿奮迅終須天外飛  
若問故巢知處在主人相戀未能歸

對酒五首

巧拙賢愚相是非何如一醉盡忘機君知天地中寬窄  
鵬鷃鸞皇各自飛



蝸牛角上爭何事，石火光中寄此身。  
 隨富隨貧且歡樂，不開口笑是癡人。  
 丹砂見火去無迹，白髮泥人來不休。  
 賴有酒仙相暖熱，松喬醉即到前頭。  
 百歲無多時壯健，一春能幾日清明。  
 相逢且莫推辭醉，聽唱陽關第四聲。  
第四聲勸君更盡一杯酒，西出陽關無故人。  
 昨日低眉問疾來，今朝收淚弔人回。  
 眼前流例君看取，且遣琵琶送一杯。

僧院花

欲悟色空為佛事，故栽芳樹在僧家。  
 細看便是華嚴偈

方便風開智慧花

老戒

我有白頭戒，聞於韓侍郎。  
 老多憂活計，病更戀班行。  
 鑿誇身健周遮說，話長不知吾免否。  
 兩鬢已成霜

洛橋寒食日作十韻

上苑風煙好，中橋道路平。  
 蹴毬塵不起，潑火雨新晴。  
 宿醉頭仍重，晨遊眼乍明。  
 老慵雖省事，春誘尚多情。  
 遇客踟躕立，尋花取次行。  
 連錢嚼金勒，鑿落寫銀罌。  
 府醞傷教送，官娃喜宴迎。  
 舞腰那及柳，歌舌不如鶯。  
 鄉國真堪戀，光陰可合輕。  
 三年過寒食，盡在洛陽城。



快活

可惜鶯啼花落處一壺濁酒送殘春可憐月好風涼夜  
一部清荷伴老身飽食安眠消日月閒談冷笑接交親  
誰知將相王侯外別有優游快活人

送令狐相公赴太原

六纛雙旌萬鐵衣并汾舊路滿光輝青衫書記何年去  
紅旆將軍昨日歸詩作馬蹄隨筆走獵酣鷹翅伴觥飛  
北都莫作多時計再為蒼生入紫微

不出

簷前新葉覆殘花席上餘盃對早茶好是老身銷日處

誰能騎馬傍人家

惜落花

夜來風雨急無復舊花林枝上三分落園中二十深日  
斜啼鳥思春盡老人心莫怪添盃飲情多酒不禁

老病

晝聽笙歌夜醉眠若非月下即花前如今老病須知分  
不負春來二十年

憶晦叔

遊山弄水攜詩卷看月尋花把酒盃六事盡思君作伴  
幾時歸到洛陽來



送徐州高僕射赴鎮

大紅旆引碧幢旌新拜將軍指點行戰將易求何足貴  
書生難得始堪榮離筵歌舞花叢散候騎刀槍雪隊迎  
應笑蹉跎白頭尹風塵唯管洛陽城

琴酒

耳根得聽琴初暢心地忘機酒半酣若使啟期兼解醉  
應言四樂不言三

聽幽蘭

琴中古曲是幽蘭為我慙慙更弄看欲得身心俱靜好  
自彈不及聽人彈

六年秋重題白蓮

素房含露玉冠鮮紺葉搖風鈿扇圓本是吳州供進藕  
今為伊水寄生蓮移根到此三千里結子經今六七年  
不獨池中花故舊兼乘舊日採花船

元相公挽詞二首

銘旌官重威儀盛騎吹聲繁鹵簿長後魏帝孫唐宰相  
六年七月葬咸陽

墓門已閉笳簫去唯有夫人哭不休蒼蒼露草咸陽壠  
此是千秋第一秋

送葬萬人皆慘澹反虞駟馬亦悲鳴琴書劍珮誰收拾



三歲遺孤新學行

臥聽法曲霓裳

金磬玉笙和已久  
牙牀角枕睡常遲  
朦朧閒夢初成後  
宛轉柔聲入破時  
樂可理心應不謬  
酒能陶性信無疑  
起嘗殘酌聽餘曲  
斜背銀缸半下帷

結之

歡愛今何在悲啼亦是空  
同為一夜夢共過十年中

五鳳樓晚望

六年八月十日作

晴陽晚照濕煙銷  
五鳳樓高天沈寥  
野綠全經朝雨洗  
林紅半被暮雲燒  
龍門翠黛眉相對  
伊水黃金線一條

自入秋來風景好  
就中最好是今朝

寄劉蘇州

去年八月哭微之  
今年八月哭敦詩  
何堪老淚交流日  
多是秋風搖落時  
泣罷幾迴深自念  
情來一倍苦相思  
同年同病同心事  
除却蘇州更是誰

送客

病上籃輿相送來  
衰容秋思兩悠哉  
涼風嫋嫋吹槐子  
却請行人勸一盃

秋思

夕照紅於燒  
晴空碧勝藍  
獸形雲不一  
弓勢月初三  
鴈



思來天北砧愁滿水南蕭條秋氣味未老已深語

酬夢得秋夕不寐見寄

碧簾絳紗帳夜涼風景清病聞和藥氣渴聽碾茶聲露  
竹偷燈影煙松護月明何言十里隔秋思一時生

題周家歌者

清緊如敲玉深圓似轉簧一聲腸一斷能有幾多腸

憶夢得

齒髮各蹉跎疎慵與病和愛花心在否見酒興如何年  
長風情少官高俗慮多幾時紅燭下聞唱竹枝歌

贈同座

春黛雙蛾嫩秋蓬兩鬢侵謀歡身太晚恨老意彌深薄  
解燈前舞尤能酒後吟花叢便不入猶自未甘心

夜招晦叔

庭草留霜池結冰黃昏鐘絕凍雲凝碧氈帳上正飄雪  
紅火爐前初炷燈高調秦箏一兩弄小花蠻榼二三升  
為君更奏湘神曲夜就儂來能不能

戲荅皇甫監時皇甫監初喪偶

寒宵勸酒君須飲君是孤眠七十身莫道非人身不煖  
十分一盞煖於人

和楊師臯傷小姬英英



白集 卷二十六  
自從嬌駭魚駭切一相依共見楊花七度飛玳瑁牀空收  
枕席琵琶絃斷倚屏幃人間有夢何曾入泉下無家豈  
是歸墳上少啼畱取淚明年寒食更沾衣

池邊卽事

氈帳胡琴出塞曲蘭塘越棹弄潮聲何言此處同風月  
薊北江南萬里情

聞樂感隣

老去親朋零落盡秋來絃管感傷多尚書宅畔悲隣笛  
廷尉門前歎雀羅綠綺窓空分妓女絳紗帳掩罷笙歌  
歡娛未足身先去爭奈書生薄命何



